

'S truagh an sceul so tha daoine 'g raitinn,
'S a bhruchd an nall oirnn le peann is paipair,—
Gun danic finid air gnìomh ro araid,
Air cinnèdh rioghail, fìor-ghlic statail.

A Chlann-Chilleain gun robh sibh ainmail ;
Fìne fiachail nam piosan airgid :
Gur h- iomadh Dubh-Ghall nach b' fhiu a shen-
achas
A chaidh gu uir leibh le luths 'ur gela-ghlac.

Craobh ur sinnsribh cha chrìon a thanic ;
Bha fios an sceil sin aig geur luchd-senachais ;—
Gum b' fholachd rìgh sibh bho chrìch na Spaine,
De sliochd Ghateluis nan euchdan dana.

Ghin de 'san uaislen 'bha buadhach, ainmail ;
B' ann diu mic Mhìli nan gnìomh ro chalma ;
Chog iad ri Eirinn le treine 'n laimhe,
'S do thug iad puic de thriuir mhac Earmuin.

Chan fhognadh baothachd no draoidhechd shena
chles
Gun cur air chul bhuath', cha b' fhiu leo 'n delbh
sin ;
Ach cogadh dian, cruaidh, gun sìth, gun tearmad,
Gu onair gnìomha, no dìth an anama.

Air sliochd Eremhain euchdich, ainmail,
Bha uaislen gleusta, fir threuna, chalma ;
B' ionnan duibh-se 's do 'n linn 'tha 'n senachas
'S len ruibh de 'n dualchas 'bhi cruaidh air armibh.

Air techd an deidh sin dhuibh 'n iar do dh-Albinn
Bu mhor 'ur foirnert le 'r doidibh garbha,
Gus 'n duc Mac-Dhomhnill dhuibh coir bu daingne
Air rioghachd na Dreallinn 's air mor ni 'dh-anbharr.